

Date – 30/03/2025

Time - 7:30 -7:40Hrs

REGIONAL NEWS BULLETIN

HEADLINES (MORNING)

- 1. Zan khat riaka Champhai tlawhtu Sports & Youth Services Minister Pu Lalnghinglova Hmar chuan nimin chawhnu khan Vanlallawma Indoor Stadium (VANIS) leh Keilungliah tuikhuah a tlawh.**
- 2. Chief Minister Pu Lalduhoma chuan nimin khan Serchhip in District Beautification Competition-a lawmman pathumna an lak a taka kalpui tanna tur a hawng.**
- 3. Mizorama tlawmngai pawl lian ber Central YMA chuan April thla hi Ram puma Fimkhur Thla atan a puang.**
- 4. Indian Meteorological Department chuan vawiin atanga April ni 2 thleng hian India hmarchhak lam chu 4 degree celcius atanga 6 degree Celsius velin a lum chhoh a rinawm thu an sawi.**

<><><>

SPORTS MINISTER

Zan khat riaka Champhai tlawhtu Sports & Youth Services Minister Pu Lalnghinglova Hmar chuan nimin chawhnu khan Vanlallawma Indoor Stadium (VANIS) leh Keilungliah tuikhuah a tlawh a. A department chan dang Excise & Narcotics Department thawktute nen an inkawm bawk a ni.

Vanlallawma Indoor Stadium-a tlawhnaah hian Pu Lalnghinglova Hmar hi District Sports & Youth Office a thawktute leh Champhai District Basketball Association hruiatu ten an lo dawngsawng a. Champhai khawpuiin Mizoram Super League (MSL) a thlen tum a Basketball Backboard chhia chu a rang lama thlaksak tum a nih thu a sawi a ni.

Pu Lalnghinglova Hmar hian Keilungliah tuikhuah tlawhin, khualzinmite hip theihna tur a hmun tha leh khawtual mi te tan pawha eizawna tling siam thei ni a hriat thu a sawi a. He hmun chei tura hmalakna pawh thui tak kalpui tawh niin, hna tan theih hun pawh hla lutuk tawh lo tura a beisei thu a sawi bawk.

Excise & Narcotics Minister ni bawk Pu Lalnghinglova Hmar hian nimin vek khan Champhaia Excise hotute pawh a kawm a. Assistant Commissioner Pu C. Thangchuanga leh O/C Pu Lalhmingthanga te nen Champhaia Excise & Narcotics Department mamawh leh hmalak dan turte sawiin inkawmna hun tha tak an nei a ni.

<><><>

CM

Chief Minister Pu Lalduhoma chuan nimin khan Serchhip in District Beautification Competition-a lawmman pathumna an lak a taka kalpui tanna tur a hawng a,

Chief Minister chuan, Serchhip chu khawpui mawi takah a la chantir theih a, nasa takin a la siam theih a ti a. Nakina a than chhoh zelna tur mual te a lang reng a, chung ram te chu mumal taka enkawl ni se, lane kawng kalna tur te pawh mumal taka lo duan a tha a ni a ti. Midang chenna tur khawpui din an ni lo va, mahni leh an tu leh fate la chen zelna tur khua din chhoh mek a ni zawk a ti a ni.

Chief Minister hian Serchhip khawpui cheimawina leh tihhmasawinna an thawh chhoh turah MLA fund atangin Public Water Drinking point siamna tur cheng nuai 5 a pe a, mipuite mamawhna a nasat tawh avangin a building thar tur la peih lo mah se Serchhip Hospital tan Dialysis khawl ngaihtuah a nih tur thu a sawi bawk.

<><><>

AMC

Tun thla ni 17-a Aizawl Treasury Bazaar kan hnua bazara thute thutna hmun sawn chuan zawm a hlawh tha hle a, Aizawl Municipal Corporation chuan thuchhuah siamin, helai hmuna eizawnga thu thinte thu tawh lo turin leh an thutna tura ruahman, Tuikual South–a AMC Multi-Complex Building-a insawn turin a ngen a ni.

Chawhmeh leh thildang zuara Treasury bazaar a thute zingah AMC thupek chu dodal a, an eizawna in a tawrh theih thu sawi awm mah se, sorkar thu zawmin an thutna tur hmunah an thu vek tawh a, Inrinni-a Tennis Court leh Zodin inkar kawngkama thu te zawng zawng pawh an insuanluh vek avangin kawngpui pawh a thawl a, traffic buai leh harsatna a thleng lo a ni.

Treasury bazaar kang vanga insawn tura tih te hi Mizoram Legislative Assembly, Dak inpui, FCS & CA Office, Agriculture office, Horticulture office leh Tennis Court chhehvel kawng kama eizawnga thil chi hrang hrang zuar te anni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Vawiin chawhnu dar 2 leh a chanve-ah Chanchinthar puan leh a ni ang.

<><><>

HNATLANGPUI

Central YMA, Aizawl Municipal Corporation leh UD&PA Department te thawhhona hnuaiah naktuk khian Aizawl khawpui ‘Faina HNATLANGPUI’ koh a ni a. Veng hrang hrangah, Branch YMA leh Local Council te kaihhruainain mahni veng chung theuh te tih fai hnatlang nei turin veng tin te beisei leh ngen an ni a. Heng bakah hian Aizawl khawpui chhunga hmun bawlhhlawh zual thlan bik te thian fai turin mi thahnemngai leh flawmngai te an thawk chhuak bawk ang.

He Faina HNATLANGPUI hawnna inkhawm hi Sikulpuikawnah zing dar 10-ah hman tur a ni a. Hetah hian UD&PA Minister leh department hotute, AMC Mayor leh official pawimawh te bakah CYMA hrulaitute leh a bul hnai YMA branch aiawh te an tel ang.

CYMA, UD&PA leh AMC te tangkawp chuan kum 2025 – 26 chhung atan Aizawl khawpui faina kawnga chak zawka hmalak a nih theih nan thawhhona thuthlung an siam a. Chumi hnuaia hmachhawp hrang hrang te zingah Faina HNATLANGPUI hi a hmahruaina a ni a. Thawhdunna kal zelah YMA Branch Fai Inelna neih tur a ni bawk a, HNATLANGPUI hawnna inkhawmah hian YMA Branch Fai Inelna 2025 chu khuhhawna neih a ni dawn a ni.



CYMA

Mizorama tlawmngai pawl lian ber Central YMA chuan April thla hi Ram puma Fimkhur Thla atan a puang a, hemi denchhen hian a hnuaia Sub-Hqrs., Group leh Branch YMA te chu anmahni huam chhungah theuh hma la turin a ngen.

CYMA-in ngenna an tih chhuahah chuan, In hmun leh lei lai ten Furpui lo thlen hma a an lei laih te nghet taka lungrem/Concrete a tih ngheh hman nise a ti a, Thal chhungin mitin in tuidawn leh tui paihna mumal taka siam a, tui chhe paihna te kawrpuih tha taka luan luh tir ngei nise an tih bakah khaw tin/Veng tinin an huam chhunga lui leh kawr-te hnawhtu a awm leh awm loh leh a him tawk em tih en fel vek nise. A him tawk lova an hriatte chu then fai ngei nise, a tul dan a zirin YMA hnatlang pawh koha tih that vek ni bawk se an ti.

An huam chhunga lungrem leh culvert-te a him tawk leh him loh dan te enfel nise. A him tawk loh chuan tih that vat dan ngaihtuah nise. Thing zar leh thingzar ro tluk hlauhawm te Forest Dept. hriattir emaw, then fai nise la. Kham/Kawngko sanga lung tla leh lei min mai thei a awm leh awm loh en fela, hlauhawm a awm chuan hma lak nghal nise an ti bawk.

Anmahni huam chhunga lei tlahniam hlun leh min thinna hmun te chhiatna nasa zawk thleng thei turte uluk taka en fel a, a tul anga invenna siam nise. Thlanmual a him em tih uluk taka en fel nise, a tul anga thlan chung pawh tui lut theilo tura Cement a zut phui vek nise an tih bakah. Chenna in fur ruahpui leh thli-ah a him dawn lova a lan chuan chhuah san rih mai a tha an ti a, heng an tarlan hoa Branch YMA ten Fimkhurna Thla an hman dan chu Central YMA-ah thehlut leh turin an ngen a ni.



Maan Ki Baat

Prime Minister Narendra Modi chuan vawiin dar 11 hian Akashvani-a ‘Mann Ki Baat’ programme-ah ram chhung leh ram pawn mipuite hnenah thu a sawi leh dawn a. Hei hi episode 120-na tur a ni ang. He programme hi

Akashvani leh Doordarshan network , AIR News website-ah te leh NewsOnAir mobile app-ah te tihchhuah a ni ang. AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.

<><><>

MET

India Meteorological Department chuan vawiin atanga April ni 2 thleng hian India hmarchhak lam chu 4 degree celcius atanga 6 degree Celsius velin a lum chhoh a rinawm thu a sawi. Ni nga chhungin India hmarchhak leh peninsular-a boruak lum ber (maximum temperature)-ah danglamna lian tham a awm dawn lo. Met department chuan naktuk hian Gangetic West Bengal leh Odisha-ah heat wave a awm an rin thu an sawi bawk .

Hun rei tak ni sa a awm emaw, hna hahthlak thawk emaw te tan khaw lum lam natna an vei theihna a sang hle tih an sawi. Nausen, tar, leh natna khirh tak nei te tan hriselna lam ngaihtuahna a sang hle. Mipuite chu khaw lum laka inthiarfihlim tur te, tui in tha tur tur in an chah a ni

<><><>